

Whakarongo e te rau
 Terei te tipuna o te mate ka piri ki au
 I tipu i te Reinga
 I tipu mai ano i te pouri'anga
 Ko Rongo-taha-a-rangi
 E huri paroa
 Ka hinga au ka takoto
 Moe tuturi, moe pepeke, moe tupoupou.
 Ko te rite i au
 Ko mahutonga e rau na i te ao
 He maero au nei
 He kaahu kake i te waru
 Kai te matuku
 E hu ana i te repo i.

Koia nei, e te Pirimia, a matou kupu i whiriwhiri ai ko Tuhoe, na he kawe mai tenei ki to aroaro kia whakaaetia.

Ko Hon. Te Pirimia, tena koutou nga rangatira o Tuhoe me Te Urewera : E koa ana ahau mo tatou kua huihui nei ki konei i tenei ra. Kaore ano ahau i wareware ki te nui o te manaaki me te aroha o to koutou iwi ki au i au i haere nei i to koutou takiwa. Ki te whakaaro a nga iwi Pakeha he whenua pai rawa to koutou takiwa, he momona tona oneone, he nui ona wahi raorao, a he whenua pai atu mo te whakanohonoho ki te tangata. Otira mehemea i penei me tatou nga tangata nana enei korero, ara, he tangata ratou kua tino tae ki taua whenua haereere ai, tirotiro ai, tera pea ratou e kite, e mohio, he parau noa iho a ratou korero e tuhituhi nei e panui nei ki te ao. I toku taenga ki to koutou takiwa ko taku i kite ai he whenua mauunga, he ngaherehere katoa, he maha ona awa ririki me ona awa nunui. He kotahitahi noa iho ona wahi raorao ona wahi ranci e pai ana hei mahinga kai, a he iti nga eka o nga wahi pera. I mua tata ake nei e kore rawa e whakaponohia mehemea i kore-rotia tera e haere mai nga rangatira o Tuhoe ki Poneke nei, a tera koutou e huihui ki roto ki te ruma o te Pirimia. I taku kitenga tuatahi ia koutou e rereke ana to koutou ahua i reira i to koutou ahua inaianei, e mau nei koutou i nga kakahu Pakeha; otira ahakoa kua mahue atu nga kakahu Maori, ko ana tangata ra ano koutou, kei te mau tonu koutou ki nga kupu o aua ra, kaore ano i rereke, a kua tae mai nei koutou ki konei hei mangai mo to koutou iwi, hei whakatakoto ki te aroaro o te Kawanatanga i nga mea e whakaaro nuitia ana e koutou. He mea nui rawa tenei kua tukua atu nei ki a koutou, a, kia kore ai koutou e pohehe ina hoki ki o koutou kainga, ka whakahaua e ahau kia hoatu ki ia tangata o koutou tetahi pukapuka o a tatou korero katoa i tenei ra, hei korero atu ma koutou ki o koutou iwi me o koutou hapu ana tae koutou ki a ratou.

Ko taku utu atu tenei mo a koutou kupu i whakatakoto nei ki toku aroaro ---e tika ana nga Maori kia whiwhi i nga painga e puta mai ana i nga matauranga o te Pakeha, notemea i te wa i mahia ai e o koutou koroua te Tiriti o Waitangi i whakaaetia i reira e Te Kuini o Ingarangi me whiwhi te Maori i aua painga, a e kore e tangohia te mana o te Maori ki ona whenua e taua Tiriti. No reira e tika ana, a e pai ana hoki ahau, i te mea ko ahau te Pirimia o te Koroni, ki te whakaae atu ki ta koutou tonu, i te mea e tino marama aua ahau tera e puta mai he ora mo koutou i runga i tenei tonu a koutou. E tino whakatika ana ahau ki to koutou manawapa mo o koutou whenua, a he pai ina whakahacrea tenei mea, kia tino tupato te mahi kia kore ai e tangohia atu ia koutou to koutou orange, ara, to koutou whenua. Kua whakamarama uai a Hon. Timi Kara na nga ruri i tupu ai nga raruraru o mua tata ake nei, i te mea kaore ano nga Maori o reira i ata mohio ki te tikanga o taua mahi, a i te mea i mahara koutou he ruri era e whakahacrea ana hei wawahi hei roherohe i to koutou whenua. Kaore, heoi ano taua ruri he ruri teihana anake, i whakahacrea taua mea mo nga mahi a te Kawanataega e pa ana ki te Koroni katoa.

Ko Hon. Timi Kara : I penei ke taku kupu, ko te take i puta ai aua raruraru, na te pohehe o Tuhoe i runga i te tauhou ki era tu mahi, a ko tetahi take na nga mahi whakakiki a nga tangata o waho atu o te rohe o Tuhoe.